


Cumegn Albula/Alvra



**Lescha digls lungatgs uffizials digl cumegn
Albula/Alvra
(Lescha digls lungatgs uffizials; ASG)**

**Acceptada dalla radunanza communal igls 17 da zarcladour 2016
e messa an viglour dalla supranza communal per igl 1. avost 2016**

Sa basond sen art. 5 ed art. 35 cif. 2 dalla constituziun communal Albula/Alvra

ò la radunanza communal Albula/Alvra

concludia:

I. Determinaziuns generalas

Art. 1

Object

Chesta lescha regla igl adiever digls lungatgs uffizials rumantsch e tudestg antras las autoritads communalas e l'administraziun.

II. Adiever digls lungatgs uffizials

Art. 2

An contact oral

Dallas radunanzas communalas, an suprastanza communal ed an cumischungs dastgan igls lungatgs uffizials neir duvors libramaintg. La persunga tgi ò mintgamai igl presidi, ò da procurar tgi tot igls commembers saptgan perseguitar las tractativas. Mintga commember dalla radunanza communal, dalla suprastanza communal u d'ena cumischung è autoriso da pretender translaziuns dallas dumondas fatgas an en lungatg uffizial tgi el tgapescha.

Art. 3

Publicaziuns

¹ Tottas publicaziuns impurtantas vignan publitzeadas da prancepi an tots dus lungatgs uffizials, surtot:

- a. constituziun, leschas, ordinaziuns ed ulteriours decrets da dretg;
- b. declaraziuns davart las votaziuns scu er cedels da votaziun e d'elecziun;
- c. publicaziuns aint igl figl uffizial;
- d. comunicaziuns allas medias ed otras comunicaziuns dallas autoritads communalas e dall'administraziun communal, schinavant tgi chellas sa drezzan all'antiera populaziun da cumegn;
- e. messadis alla radunanza communal;
- f. inscripziuns, products da stampa (tgeas da brevs, anvaloppas etc.), publicaziuns, reclamas e la gronda part dalla pagina-web digl cumegn.

² La suprastanza dastga conceder excepziuns per comunicaziuns tgi èn drizzadas ad en cres spezial da persungas u da muntada inferioura.

³ Rapports, expertisas, descripciuns e tgossas sumigliaintas vignan cunsigneidas per regla angal an lungatg tudestg.

⁴ Decisiuns e disposiziuns dallas autoritads communalas e dall'administraziun sa drezzan per regla tenor la dumonda inoltrada an scretg.

Art. 4

Correspondenza

¹ Mintga persunga so sa drizzar allas autoritads communalas ainten egn digls lungatgs uffizials tenor sies giaveisch.

² Las autoritads communalas e l'administraziun raspondan ad inoltraziuns e dumondas an scretg, per regla an chel lungatg uffizial tgi è nia applitgia ainten la dumonda.

³ Dumondas a bucca vignan per regla raspundeidas an chel lungatg, tgi la dumonda è neida fatga.

Art. 5

Protocols

Igls protocols dalla radunanza communal, dalla suprastanza communal, dall'administraziun scu er dallas cumischungs, vignan scretgs per regla an egn digls lungatgs uffizials.

Art. 6

Inscripsiuns

Inscripsiuns sen bietgs publics digl cumegn succedan an dus lungatgs.

III. Disposiziuns executivas e finalas

Art. 7

Execuziun

Las autoritads communalas e l'administraziun exequeschan chella lescha an lur sectours da cumpetenzza correspondents. È la cumpetenzza betg reglada cleramaintg, schea ella tar la suprastanza communal.

Art. 8

Antrada an vigour

¹ La lescha preschainta sottastat agl referendum facultativ.

² La suprastanza communal fixescha l'antrada an vigour da chella lescha. ¹

³ Cun l'antrada an vigour da chella lescha, è abolidas tottas determinaziuns d'oters decrets, tgi cunterfon a chella.

Igl mastral

Daniel Albertin

Igl canzlist

Maurus Engler